

nio Agnelli. Certe in editione Bacchiniana non paucae lacunae occurrunt, & praefertim in postremis Archiepiscoporum Vitis, in quibus tamen curiosus Lector ab Agnello teste oculato plura expectabat. At nunc vadem me praesto, nihil in textu Agnelli immutatum, nihil additum, aut demtum. Qualia in Codice Estensi invenit Bacchinius, integra ea evulgavit; ac propterea antiquioribus temporibus lacunae illae tribuendae. Serius autem didicimus, in Vaticana quoque Bibliotheca alterum Agnelli Codicem MSTum adservari. Sitne ille recentis manus, an Estensi vetustior, ignotum mihi. Denique, ut hoc etiam moneam, Vitam S. Barbatiani ex antiquo Ravennate *Lectionario* edidit Bacchinius in Appendice. Mirari subit, cur non & Codicem ipsum Agnelli in Estensi Bibliotheca existentem laudarit, ubi post ejus Pontificale eadem Vita una cum aliis priorum praesulum Ravennatum legitur, & quidem emendatior, quam edita ex Codice Ravennate. Has ego emendationes adjunxi. Reliquas autem Vitas, aliaque monumenta ad Ravennam spectantia, & in Estensi Codice scripta, praetermissa quidem a Bacchinio, sed plane digna quae ederentur, ego in nostram collectionem suo loco inferam. Sed jam audiatur Bacchinius ipse de Agnello, ejusque erroribus fusius agens.